

禮儀典第一百二十八卷

謚法部紀事二

唐書宇文士及傳士及撫幼弟孤兄子以友睦稱好周卹親戚故人然過自奉養服玩食飲必極豐侈有司謚曰恭黃門侍郎劉洎曰士及居家侈肆不可謂恭乃改曰縱

皇甫無逸傳無逸卒贈禮部尚書謚曰孝王珪駁曰無逸入蜀不能與母俱留卒京師子道未足稱不可謂孝乃更謚良

冊府元龜虞世南卒贈禮部尚書貞觀十二年十一月勅曰虞世南學綜古今行篤終始至孝忠直事多弘益易名之典抑有舊章前雖謚懿未盡其美可謚曰文懿 蕭瑀卒贈司空太常初謚曰

德尚書省謚曰肅太宗以易名之典必考其行蕭瑀性多猜貳有失其真更據實典曰貞褊公

唐書封倫傳倫字德彝貞觀元年卒贈司空謚曰明倫資險佞內挾數刺人主意陰導而陽合之外謹順居處衣服陋素而交官府賄贈狼籍然善矯飾居之自如人莫能探其膺肺隱刺之亂數進忠策太宗以爲誠橫賜累萬又密言于高祖曰秦王恃功頽頑太子下若不蚤立則亟圖之情曰太子

曰爲四海不顧其親乞養者謂何及高祖議廢立倫固諫止當時語祕無知者卒後事寢聞十七年治書侍御史唐臨追劾姦狀帝下其議百官民部尙書唐倫等議倫寵極生前而罪暴身後所歷官不可盡奪請還贈改諡以懲儉壬有詔奪司空削食封改諡爲繆

許敬宗傳敬宗字延族高宗卽位遷禮部尙書敬宗饗沓遂以女嫁蠻酋馮盎子多私所聘有司劾舉下除鄭州刺史俄復官營第舍華僭至造連樓使諸妓走馬其上縱酒奏樂自娛嬖其婢因以繼室假姓虞子昂蒸之敬宗怒黜虞奏斥昂嶺外咸亨初卒年八十一帝爲舉哀詔百官哭其第冊贈開府儀同三司揚州大都督陪葬昭陵太常博士袁思古議敬宗棄子荒徼嫁女蠻落諡曰繆其孫彥伯訴思古有嫌詔更議博士王福時曰何曾忠而孝以日食萬錢諡繆醜况敬宗忠孝兩棄飲食男女之累過之執不改有詔尙書省雜議更諡曰恭

大唐新語許敬宗父善心與虞基同爲字文化及所害封德彝時爲內史舍人備見其事貞觀初敬宗以便佞爲恩德彝薄其爲人每謂人曰虞基被戮虞南削削以請代善心之死敬宗蹈舞以求生敬宗深愧恨焉初煬帝之被戮也隋官賀化及善心獨不至化及以其人望而釋之善心又不舞蹈

由是見害及爲封德彝立傳盛加其罪惡掌知國史記注不直論者尤之與李義府贊立則天屠害
朝宰公卿以下重足累息移皇家之社稷勦生人之性命敬宗手推轂焉子昂頗有才藻爲太子舍
人母裴氏有姿色敬宗以爲繼假姓虞氏昂素與之通敬宗奏昂不孝流於嶺南又納資數十萬嫁
女與蠻首領馮盜子及監門將軍錢九隴叙其閭閻又爲子娶尉遲寶琳孫女利其金帛乃爲寶琳
父敬德修傳隱其過咎太宗作威鳳賦賜長孫無忌敬宗改云賜敬德其虛美隱惡皆此類也敬宗
卒博士袁思古等議曰敬宗位以才昇歷居清級棄長子於荒徼嫁少女於夷落聞詩聞禮事絕於
家庭納采問名唯同於黷貨易名之典須憑實行案諡法名與實爽曰繆請諡爲繆敬宗孫彥伯訴
於執政請改諡禮官議以爲旣過能改曰恭乃諡爲恭彥伯昂之子也旣與思古忿競將於衆中毆
之思古曰吾與賢家君報讎緣何反怒彥伯大慙而退

唐書韋巨源傳臨淄王平諸韋家人請避之巨源曰吾大臣無容見難不赴出都街亂兵殺之年八
十睿宗立贈特進荊州大都督博士李處直請諡爲昭戶部員外郎李邕以巨源附武三思爲相託
韋后親屬諡昭爲非處直執不改邕列陳其惡不見用然世皆直邕

冊府元龜韋巨源卒贈特進荊州大都督太常博士李處直議諡曰昭戶部員外郎李邕駁之曰三思引之爲相阿韋託之爲親無功而封無德而祿同族則醜正安石他人則附邪楚客諡之曰昭良恐不當初巨源與安石迭爲宰相時人以爲情不相叶故邕以此稱之處直仍固請依前諡爲定邕又貶曰夫古之議諡在乎勸沮將杜小人之業冀長君子之風故善者雖在不貴仕而沒有餘名此賢達所以守節也爲惡者雖生有所幸死懷所懲此回邪所以易心也嗚呼巨源嘗未斯察而乃聞義不從與惡相濟蓄罔上之志叶群凶之謀苟容聖朝貪昧厚祿自以宰臣之貴不崇朝而賈害者固鬼得而誅之也彼則匹夫之微未受命而行刑者固人得而誅之也幽明之慎斷焉可知天地之心自此而見矣頃者皇運中興功臣翼政時序未幾邪逆執權姦慝者拜爵於私門忠正者降黜於藩郡巨源此際用事方殷於阿韋何親而結爲昆季於國家何力而累忝大官此則關通中人附會武氏託城社之固亂皇家之基故其罪一也又國之大事在祀與戎酌於禮經陳於郊野將以對越天地光揚祖宗旣告成功以觀海內推昔亞獻不聞婦人阿韋畜無君之誠懷自達之意潛圖帝位議啄皇孫昇壇擬儀拜賜明命將豫家事無守國章巨源創跡於前悖演成功於後時有禮部侍郎

徐堅太常博士唐紹蔣欽緒彭景直並言之莫從其罪二也又上天不弔先帝遇毒悔禍無及阿韋將篡畫計未果逆心尙搖周章夷猶倉卒迷繆於是太平公主矯爲陳謀上官昭容給草遺詔故得今上輔政阿韋叅謀大業垂成而休命中輟者職繇巨源躡韋溫之足楚客附巨源之耳梟聲遽發狼顧相驚以阿韋臨朝以韋溫當國其罪三也又人爲邦本財實聚人奪其財則人心自離無其人則國本何恃巨源屢踐台輔專行勾徵廢越條章崇尚侵刻樹怨天下剝害生靈兆庶流離戶言減耗況以三思食邑往在貝州時屬久陰災逢多雨租庸捐免甲令昭明匪今獨然自古不易三思慮其封物巨源啟此異端以爲稼穡湮沈雖無菽粟蠶桑織紉可輔庸調致使河朔黎人海內士女去其鄉井鬻其子孫饑寒切身朝夕奔命其罪四也但巨源長於華宗仕於累代作萬國之相處具瞻之秋蔽日月之層輝負丘山之重責今乃妄加褻述安能分謗者哉當時雖不從豈議論者是之唐書章懷太子賢傳賢字明允上元元年立爲皇太子調露中武后令人發其陰事廢爲庶人開耀元年徙賢巴州武后得政詔左金吾將軍丘神勣檢衛賢第迫令自殺神龍初贈司徒遣使迎喪陪葬乾陵睿宗立追贈皇太子及諡

韋湊傳湊授鴻臚少卿徙太府兼通事舍人時改葬故太子重俊有詔加諡又詔雪李多祚等罪議贈官湊上言王者發號出令必法天道善善著惡惡明也賞罰所不加則考行立諡以褒貶之臣議其君子議其父曰靈曰厲者不敢以私亂公也臣伏見故太子與多祚等擁北軍犯宸居破扉斬關兵指黃屋騎騰紫微帝御元武門親諭逆順太子據鞍自若督衆不止逆黨悔非回兵執賊多祚伏誅太子乃遁去明日帝見群臣涕數行下曰幾不與公等相見其爲危甚矣臣子之禮過位必趨感路馬芻有誅昔漢成帝爲太子行不敢絕馳道秦師免胄過周北門王孫滿策其必敗推此則太子稱兵宮中爲悖已甚以斬三思父子而嘉之乎則弄兵討逆以安君父可也因欲自立則是爲逆又奚可褒此時韋氏逆未明義未絕於太子也子無廢母之理非中宗命廢之則又劫父廢母且君或不君臣安可不臣父或不父子安可不子晉太子申生諡曰恭漢太子據諡曰戾今太子乃諡節閔臣所未諭願與議諡者質於御前使臣言非耶甘鼎鑊之誅申大義示天下臣言是耶咸蒙冰釋不復異議如曰未然奈何使後世亂臣賊子資以爲辭宜易諡以合經禮多祚等罪云免而不云雪帝瞿然引內閣中勞曰誠如卿言業已爾奈何對曰太子實逆不可以褒請質行以諡時大臣亦重

改唯罷多祚等贈官

裴守真傳守真子子餘爲岐王府長史卒諡曰孝時程行謐諡貞中書令張說歎曰二諡可謂無愧矣

魏知古傳知古由黃門監改紫微令與姚元崇不協除工部尙書罷政事開元三年卒年六十九宋璟聞而歎曰叔向古之遺直子產古之遺愛兼之者其魏公乎贈幽州都督諡曰忠

宋慶禮傳慶禮爲營州都督開屯田八十餘所追拔漁陽淄青沒戶還舊田宅又集商胡立邸肆不數年倉庾充居人蕃輯卒贈工部尙書慶禮爲政嚴少私吏畏威不敢犯太常博士張星以好巧自是諡曰專禮部員外郎張九齡申駁曰慶禮國勞臣在邊垂三十年往成營州士纔數千無甲兵疆衛指期而往不失所慮遂罷海運收歲儲邊亭晏然其功可推不當醜諡慶禮兄子辭玉亦自詣闕訴改諡曰敬

杜暹傳暹卒太常諡曰貞肅右司員外郎劉同昇等以暹行忠孝諡有未盡博士裴總謂暹往以墨衰受命安西雖勤勞於國不得盡孝其子列訴帝更敕有司考定卒諡貞孝

裴行儉傳行儉子光庭卒年五十八贈太師初吏部求人不以資考爲限所獎拔唯其才往往得俊
父任之士亦自奮其後士人猥衆專務趨競銓品枉撓光庭懲之因行儉長名榜乃爲循資格無賢
不肖一據資考配擬又促選限盡正月任門下省主事閻麟之專主過官凡麟之裁定光庭輒然可
時語曰麟之口光庭手素與蕭嵩輕重不平及卒嵩奏一切罷之光庭所引盡斥外官博士孫琬以
其用循資格非獎勸之誼諡曰克平時以爲希嵩意帝聞特賜諡曰忠憲詔中書令張九齡文其碑
冊府元龜裴光庭卒史官韋述以改諡爲非論曰春秋之義諸侯死王事葬之加一等蓋加其有功
也而不及其賞也爰至漢魏則襁之卽受寵被寵宥唯德是褒豈虛受也近代以來寵贈無紀或以
職位崇顯一切優錫或以子孫榮貴恩例無加賢愚虛實爲一貫矣裴光庭以守法之吏驟登相位
踐我機衡豈不多愧贈以師範何其濫歟張燕公有扶翊之勳居講諷之舊秩躋九命官歷二端議
者猶謂贈之過當況光庭去斯猶遠何妄竊之甚哉蓋名器假人昔賢之所惋也

唐書楊綰傳綰薨太常諡曰文貞比部郎中蘇端儉人也持異議宰相常衰陰助之帝以其言醜險
不實貶端巴州員外司馬猶賜諡曰文簡

冊府元龜楊綰卒詔曰褒德勸善春秋之舊章考行易名禮經之通典垂範作則存乎格言故朝議大夫中書侍郎同中書門下平章事集賢殿崇文館太學博士修國史上柱國賜紫金魚袋贈司徒楊綰履道居貞含和毓德行爲人紀文合典謨清而晦名無自伐之善約以師儉有不矜之謙方冊直書秩宗相禮群稱良史學茂醇儒委任樞衡掌茲密命彌契沃心之道累陳造膝之誠將以布天下五行之和同君臣一德之運遽軫藏舟之歎未展濟川之材素業久而逾彰清風浚而可尙自古節終之義皆賜以美名諡法曰忠信愛人曰文平易不懈曰簡宜諡曰文簡以其簡儉之風厚於俗也

唐書顏杲卿傳杲卿字昕與爲營田判官假常山太守安祿山反杲卿及長史袁履謙皆被害肅宗在鳳翔真卿表其枉乾元初贈杲卿太子太保諡曰忠節封其妻崔清河郡夫人初博士裴郁以杲卿不執政但諡曰忠議者不平故以二字諡焉

冊府元龜吳兢爲嘗王傳天寶八載卒於家寶應二年三月洪吉等州觀察使洪州刺史張鎰奏曰故嘗王傳吳兢先朝史臣歷踐中外大行忠信彰於朝野伏以訓誡明旨諡法攸遵臣早歲服膺備

知名實相副特乞聖恩褒其嘉謚從之

唐書韋安石傳安石子陟授吏部尚書卒年六十五永泰元年贈尚書左僕射太常博士程皓議謚忠孝顏真卿以爲許國養親不兩立不當合二行爲謚主客員外郎歸崇敬亦駁正之右僕射郭英父無學術卒用太常議云

苗晉卿傳晉卿永泰初薨贈太師謚曰懿獻元載未顯時爲晉卿所遇載方相故諷有司改謚文貞呂誼傳誼卒贈吏部尚書永泰中嚴郢以故吏請謚有司博士獨孤及謚曰肅郢以故事宰相謚皆二名請益曰忠肅及執奏謂謚在義美惡不在多名文王伐崇周公殺三監淮夷重耳一戰而霸而謚曰文冀缺之恪甯俞之忠隨會不忘其君而謚曰武故知稱其大略其細也且二名謚非古也漢興蕭何張良霍去病霍光以文武大略佐漢致太平一名不盡其善乃有文終文成景桓宣成之謚唐興參用漢制魏徵以王道佐時近文愛君忘身近貞二者並優廢一莫可故曰文貞蕭瑀端直近貞性多猜近褊言褊則失貞稱貞則遺褊故曰貞褊蓋有爲爲之也若跡無異稱則易以一字故杜如晦曰成封德彝曰明王珪曰懿陳叔達曰忠溫彥博曰恭岑文本曰獻韋巨源曰昭皆當時赫赫

居宰相位者諡不過一名而言故事宰相必以二名固所未聞宜如前諡遂不改

賈循傳循父會有高節時號關中曾子卒縣人私諡曰廣孝徵君元宗以循有功詔贈其父常山太守祿山反使循守幽州臬卿招之以傾賊巢穴循許可爲向潤客等發其謀賊縊之建中二年贈太尉諡曰忠

孟郊傳郊卒年六十四張籍諡曰貞曜先生

冊府元龜令狐楚爲興元節度使將死戒諸子曰吾生何益於人無請諡號無受軍府贈贈葬以布車一乘無或加飾無用鼓吹及終將葬嗣子請奉行遺言詔曰生爲名臣歿有理命終始之分可謂兩全然以鹵簿哀榮之末節難違往意諡國家之大典須守彝章鹵簿宜停易名須准舊例太常諡曰文 元載爲中書侍郎同中書門下平章事誅死太常博士崔韶請諡曰荒左司郎中韋孔

景請下太常重議博士王炎改諡成縱二議交持故事不行爾後太常王彥威議曰元載諡成則不得爲縱縱則不得爲成縱並施美惡齊致考之常法實不通經夫蕭瑀諡貞詔命加編事出恩制不可擬據依爾後崔韶以平厲諡楊炎以壯繆易伊慎此皆感於貞編混淆不可之文詳在駁議今

明其說恐悞後來事寢不報

唐書段秀實傳秀實字成公拜四鎮北庭行軍涇原鄭穎節度使建中初朱泚反秀實知不可乃陽與合陰結將軍劉海賓姚令言都虞候何明禮欲圖泚三人者皆秀實素所厚會源休教泚僞迎天子遣將韓旻領銳師三千疾馳奉天秀實以爲宗社之危不容喘乃遣人諭大吏岐靈岳竊取令言印不獲乃倒用司農印追其兵旻至駱驛得符還秀實謂海賓曰旻之來吾等無遺類我當直搏殺賊不然則死乃約事急爲繼而令明禮應於外翌日泚召秀實計事源休姚令言李忠臣李子平皆在坐秀實戎服與休並語至僭位勃然起執休腕奪其象笏奮而前唾泚面大罵曰狂賊可磔萬段我豈從汝反耶遂擊之泚舉臂捍笏中顙流血巖面削鬣走賊衆未敢動而海賓等無至者秀實大呼曰我不同反胡不殺我遂遇害興元元年詔贈太尉諡曰忠烈

冊府元龜王武俊爲成德軍節度使貞元十七年薨太常諡曰威烈德宗曰武俊盡忠奉國賜諡忠烈

王士真爲成德軍節度使卒以其子承宗不順不加諡太常博士馮宿以爲懷柔之義不可遺其忠

勞遂加之美諡

馬燧爲司徒卒太常奏燧諡景武上改爲莊武以避太祖諡

唐書獨孤及傳及改太常博士或言景皇帝不宜爲太祖及據禮條上諡呂誣盧奕郭知運等無浮美無隱惡得褒貶之正

冊府元龜張伯儀爲荆南節度使李希烈叛詔伯儀收安州官軍失利後除右龍武統軍及卒伯儀故吏請諡於有司博士李吉甫論之曰或以伯儀嘗以推轂之任挫師安州於諡法得無貶乎愚以爲不然自中興三十年而來兵未戰者患在將帥以養寇自重縱敵藩身若進而亡師貶以爲誠則總干戈者必托於萬全之名而忘一戰之効矣然則保其利者亦君子所嫌也錄其忠而勸善者非陽秋之志歟矧平居進退之節不敢二色稱爲忠臣議名之際褒勸所在請諡曰恭以旌厥美

唐書顏真卿傳真卿字清臣封魯郡公帝崩以爲禮儀使因奏列聖諡繫請從初議爲定袁傖固排之罷不報李希烈陷汝州遣真卿往諭之真卿度必死乃作遺表墓誌祭文指寢室西壁下曰此吾殯所也希烈僭稱帝使問儀式對曰老夫耄矣曾掌國禮所記諸侯朝覲耳興元後王師復振賊慮變遣將辛景臻安華至其所積薪於庭曰不能屈節當焚死真卿起赴火景臻等據止之希烈弟希

情坐朱泚誅希烈因發怒使閹奴等害真卿曰有詔真卿再拜奴曰宜賜卿死曰老臣無狀罪當死然使人何日長安來奴曰從大梁來罵曰乃逆賊耳何詔云遂縊殺年七十六嗣曹王皐聞之泣下三軍皆慟因表其大節准蔡平子頽碩護喪還帝廢朝五日贈司徒諡文忠

冊府元龜伊慎卒贈太子太保太常博士崔韶請諡壯繆吏部尚書韓皐駁議不報 馬暢卒贈

工部尚書太常博士林寶議諡曰敬工部郎中崔備駁議曰謹按諡法敬字之義與馬暢始終名跡不同考行之義尚垂易名之典未正事須再牒禮院請重議者且以暢墳土猶濕物議尚存皆可徵言盡堪覆視在春秋隱惡之義可也加史冊虛美之命難乎况尚書責實當究是非易名宜存褒貶夫國之禮法懸在不刊而文士多病於愧詞史臣或許其僞傳舊章既失後代何觀雖以禮之愛久無而亂名之責豈絕幸稽前士用示後人其馬暢所諡爲敬請更參議博士崔韶改諡曰縱議曰馬暢承藉故業歷居通顯家富於財以奢縱自處不能撫安嫂姪使之離析其干進也赴利如轉圓其居家也操下如束濕故時論鄙之謹按國史宇文士及居家侈縱諡爲縱暢之行已同於士及請以縱爲諡 范希朝卒贈太師太常博士馮定請諡忠武禮部員外郎王源中駁請下太常重定太

常請如前諡忠武王源中重駁博士王塾改諡宣

唐書陸質傳質爲給事中憲宗爲太子詔侍讀質本名淳避太子名故改質病甚太子已卽位爲臨問加禮卒門人以質能文聖人書通於後世私共諡曰文通先生

張九齡傳九齡曾孫仲方進倉部員外郎會呂溫等以劾奏宰相李吉甫不實坐斥去仲方以溫黨補金州刺史宦人奪民田仲方三疏申理卒與民直入爲度支郎中吉甫卒太常諡恭懿博士尉遲汾請諡敬憲仲方挾前怨未已因上議曰古之諡考大節略細行善善惡惡一言而足按吉甫雖多才多藝而側媚取容疊致台榭寔信易謀事無成功且兵凶器不可從我始至以伐罪則邀必成功今內有賊輔臣之盜外有懷毒蠱之臣師徒暴野農不得在畝婦不得在桑耗賦殫蓄尸僵血流鬻骼成岳毒痛之痛訴天無辜階禍之發實始吉甫又言吉甫平易柔寬名不配行請俟蔡平然後議之憲宗方用兵疾其言醜訐貶爲遂州司馬仲方確正有風節旣駁吉甫諡世不直其言

冊府元龜張柬之爲相誅張昌宗輔立中宗爲武三思所害元和三年柬之曾孫曠以諡事詣中書陳訴宰相上聞因令有司授曠官仍定柬之等諡柬之爲文正彥範爲忠烈敬暉爲貞烈崔元暉爲

文忠袁恕己爲貞烈

杜佑卒贈太傅太常博士柳應規諡忠簡太常博士尉遲汾又議曰佑之

寬容得衆全和葆光不病於物類其能考終得不爲寬容乎和好不爭自卑士而極重任一心於理以惠物潔行廉正人無尤怨得不爲一德不懈乎請諡爲安簡

李愬元和中平吳元濟有功及

卒博士元從質諡曰武尚書省議以其諡與父西平王晟同宜改之從質云愬無他行以功定諡不可改也問難數四竟不能駁其議今之定諡則不然也唯顧其勢望恐爲子孫之嫌歸於苟且故會昌朝陳商曾爲禮部侍郎貽博士書曰古者太常博士職以公卿諸侯大夫死第其所行舉而褒貶焉使世世以一二字觀其道與不道拘橐言爲文武忠孝所以失褒也執己見爲繆荒赧醜所以失貶也二柄之失博士不得職往者不得享爲政者不得道夫執己見拘橐言是有上中下賢其一二字視縉金之重輕以縉金重輕貽後之庸微偷忠盜貞罔世間人爲盡善加於行路皆博士忍其過而阿其時也夫天下人望執事以爲質正然未見有執事能針其膏肓之病者若當貶而褒當褒而貶是猶錄跖殺夷經緯混淆者也褒而褒之貶而貶之經紀既著善惡懸白勸大而用微所以使後代力行不易如日月山河江海草木四支七竅以統幹而治自從其教也於戲博士職蓋不細願出